



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მახინჯაურის განძი

მახინჯაურის განძი, ბრინჯაოს ნივთების განძი სოფ. მახინჯაურიდან (ხელვაჩაურის მუნიციპ., მდ. ყოროლისწყლის ხეობა). განძის შესახებ ცნობები დაცულია ლიტ. წყაროში. იგი აღმოუჩენიათ XX ს. დასაწყისში. თიხის ჭურჭელში ცალ-ცალკე მოთავსებული ნივთები მინაში ყოფილა ჩაფლული. გადმოცემის მიხედვით, განძი შედგებოდა ბრინჯაოს თოხებისგან, სეგმენტური და წალღის მაგვარი იარაღებისაგან, ასევე განსაკუთრებული ტიპის ფართოპირიანი ბრინჯაოს ცულისაგან. განძთან ერთად აღმოუჩენიათ ქურა (სახელოსნო) საცეცხლურის ნაშთებით. ამ საინტერესო განძის შესახებ პირველი ცნობები გვხვდება რუსი არქეოლოგის ა. იესენის ნაშრომში. წერილობით ინფორმაციაზე დაყრდნობით, ე. პახომოვა, რ-საც თითქოს უნახავს მ. გ., მიიჩნევს, რომ ის, სავარაუდოდ, ძვ. წ. I ათასწლეულის დასაწყისით უნდა დათარიღდეს. ამჟამად განძის ბედი უცნობია.

ლიტ.: რ ა მ ი შ ვ ი ლ ი ა., კოლხეთის მატერიალური კულტურის ისტორიიდან, ბათ., 1974; ქ ო რ ი ძ ე დ., კოლხური კულტურის ისტორიისათვის, თბ., 1965; И е с с е н А., К вопросу о древнейшей металлургии меди на Кавказе, „Известия Гос. академии истории материальной культуры“, 1935, в. 120.

ლ. ჯიბლაძე
